



GRUPO PROVINCIAL

V-32244006

xosebaltar@bng.gal

Bernardo Varela López, voceiro do grupo provincial do BNG na Deputación Provincial de Ourense, María Mangana e Xosé Manuel Puga deputados do mesmo grupo provincial, ao abeiro da Lei da Administración Local de Galiza e demais disposicións concordantes presenta a seguinte **MOCIÓN PARA A DEFENSA DOS SECTORES AGROGANDEIROS DA PROVINCIA DE OURENSE**, para o seu debate en Pleno

EXPOSICIÓN DE MOTIVOS

En estes días estamos a observar con preocupación as mobilizacións dos sectores agrarios e gandeiros de Galiza e especialmente na provincia de Ourense.

O sector produtor galego manifestase con total lexitimidade na defensa dos seus intereses.

Estas mobilizacións traen de novo á actualidade as consecuencias da aplicación das políticas agrarias, e que son moi evidentes na nosa provincia:

- Abandono de explotacións gandeiras e agrarias, e consecuente desaparición de boa parte do nosos sectores produtivos.
- Baixos prezos das producións agrarias e obriga aos nosos produtores, en moitos casos, de venda “a perdas” dos seus produtos.
- Aplicación de normativas estandarizadas para toda a UE sen ter e conta as peculiaridades dos distintos territorios, e que acaban producindo unha “burocratización abusiva e excesiva” sobre as explotacións agrarias.

Pero é oportuno facer unha reflexión colectiva sobre a aplicación destas medidas.

Situémonos na orixe da actual PAC, coa reforma MacSharry (chamada así por ser naqueles momentos o Comisario de Agricultura: Ray MacSharry) en 1992 e que supuxo un cambio da PAC.

Unha CEE (Comunidade Económica Europea) que viña desde mediados de 1960 dos distintos acordos agrícolas da Europa da postguerra, na que se

priorizaba, estimulaba e incentibaba a produción de alimentos, garantindo prezos agrarios á produción.

Pois ben, en 1992 a citada reforma MacSharry baseouse na redución dos prezos agrícolas para aumentar a competitividade dos produtos no mercado mundial, na compensación por medio de axudas directas da perda de ingresos experimentada polos agricultores, así como diversas medidas relacionadas cos mecanismos de mercado e a protección do medio ambiente.

É dicir, as mensaxes da EU, do goberno do Estado Español e da Xunta de Galiza, centráronse, nos anos 90 e 2000, en **advertir** ao noso sector produtor que estabamos na época da GLOBALIZACIÓN e que tiñamos que “modernizarnos” para competir no mercado global (ao mesmo tempo que se asinaban acordos na OMC que obrigaban á EU a importar produtos agrarios sobre todo de USA e Australia).

Estas “mensaxes” viñeron acompañadas de medidas políticas de redución de explotacións gandeiras (cotas do leite) e, por suposto, da baixada dos PREZOS DAS PRODUCCIÓNS AGRARIAS, especialmente no sector lácteo e carne de vacún, porque tiñamos que ser “**competitivos**”.

Xa naqueles momentos desde o nacionalismo galego, tanto sindical como político, fixemos á análise correcta do que iso ía traer consigo: desmantelamento dos nosos sectores produtivos, abandono do medio rural e peores condicións económicas para os nosos produtores.

“Daqueles polvos, estes lodos”.

E agora en 2024, desde Ministerio de Agricultura e Consellería do Medio Rural, comezan a falar do termo de “*preferencia comunitaria*” (termo usado polo nacionalismo galego xa en 1992) para situar boa parte dos problemas actuais nas importación de produtos agrícolas de fora da UE.

E desde 1992 até hoxe, as sucesivas REFORMAS DA PAC (1999, 2003, chequeo médico de 2008, 2013, e xa recentemente a reforma 2023/2027) insistiron nese modelo lesivo para Galiza, coa convivencia política de Partido Popular e PSOE, provocando a expulsión de miles de labregos e labregas do agro da nosa provincia.

Acompañemos só algúns datos do sector de vacún de carne de Ourense, para ilustrar estas afirmacións:

- No ano 2008 había en Galiza 26.363 explotacións de vacún de carne, e 2.259 en Ourense.
- No ano 2020 quedaban en Galiza 18.879, e só 1.425 en Ourense.
- En 2024 este censo reduciuse nun 30% máis.

- A redución deste tipo de explotacións (especialmente as familiares) ronda o 50% en 15 anos.
- Fai 30 anos o prezo de venta estaba en 800 pesetas (o que equivale a 4,8 €).
- Hoxe os prezos non superan os 7,5 € de media, pero os custes de produción, especialmente disparados nos últimos 2 anos, aumentaron un 200%.

No que fai referencia con outro sector clave para a nosa provincia, o da pataca, que non está afectada directamente pola PAC, ao non estar incluída na OCM, a histórica situación de incertidume de prezos, mantense actualmente.

E non só iso, á incertidume de prezos compre engadirlle a escasa mellora de infraestruturas como regadío, ás innumerables trabas normativas e burocráticas, e ao aumento desmedido dos custes de produción.

Anunciou a Xunta de Galiza a elaboración e posta en marcha dun Plan da Limia, do que nada máis se soubo e que está metido nun caixón da Consellería do Medio Rural.

Un Plan que debería aportar medidas de apoio á agricultura e gandería da comarca da Limia, e do que só se anuncia a posta en marcha de 4 novos regadíos (que xa estaban proxectados en 2008).

No ano 2022 o Grupo Provincial do BNG xa traía unha Moción na que se reclamaba da Xunta de Galiza diversas medidas relacionadas co citado Plan da Limia, e que foron aprobadas por esta corporación provincial.

Polo exposto, traemos ao Pleno de esta Corporación Municipal a adopción dos seguintes

ACORDOS:

1.- Tal e como se acordou no pleno de outubro de 2022, **reclamar** da Xunta de Galiza que a través da Consellería do Medio Rural faga público con carácter inmediato o “Plan Estratéxico do Sector Agrario da Limia” xa rematado en Novembro do ano 2021, e que se implementen con carácter inmediato os fondos necesarios para escomenzar a executar as súas determinacións.

2.- Esixir do Ministerio de Agricultura, Pesca e Alimentación a modificación da Lei da Cadea Alimentar de 2021, de xeito que os prezos pagados ao sector

produtor nunca podan estar por baixo dos custes de produción, máis o marxe de beneficio para a explotación agraria.

3.- Esixir da Consellería do Medio Rural a recuperación da fórmula de Contratos Homologados para fixar prezos dignos ao sector produtor, a través das distintas Mesas de Negociación entre sector produtor e empresas elaboradoras, coa mediación da Xunta de Galiza.

4.- Esixir da Consellería do Medio Rural a reforma e adaptación do actual PEPAC ás necesidades do agro galego, con apoio especial as nosas pequenas e medianas explotacións, favorecendo a transformación agraria e os circuitos curtos de comercialización.

5.- Esixir da Consellería do Medio Rural o desenvolvemento e recuperación dos obxectivos do Banco de Terras para a posta en produción de SAU (co obxectivo das 30.000 ha na nosa provincia) para poñelas a disposición das explotacións vitícolas, agrarias e gandeiras de agricultores e non da especulación de fondos de investimento foráneos.

6.- Esixir da Consellería do Medio Rural o apoio decidido á agricultura ecolóxica, comezando por abonar as axudas pendentes a produtores e produtoras de ecolóxico.

Ourense, 8 de febreiro de 2024.

~~Asdo: Bernardo Varela López
Voceiro do grupo provincial do BNG~~

Asdo:

A SR. PRESIDENTE DA DEPUTACIÓN DE OURENSE